

Mál nr. 2
Knattspyrnudeild Hamars
gegn
Knattspyrnudeild UMFH

Kæra Hamars

Gerð er krafa um að leikurinn sé dæmdur 0-3 Hamri í vil.

Málavextir

Í leik UMFH og Hamars í VISA-bikarkeppni KSÍ þann 18.05.2004, kom leikmaðurinn Árni Baldvin Ólafsson við sögu í leiknum. Hann kom inn á á 82. mín. Árni er skv. félagaskrá KSÍ skráður í lið Stjörnunnar.

Lagarök

Vísað er í reglugerð KSÍ um félagaskipti leikmanna – félagaskipti innanlands og hlutgengi.

Röksemdir

Samkvæmt lögum um hlutgengi leikmanna og félagaskipti, ber leikmanni að hafa félagaskipti lágmark degi fyrir leik síns nýja félags.

- 1) Árni Baldvin tók þátt í leik UMFH og Hamars þann 18.05.2004, sjá skjal 1. leikskýrsla umrædds leiks.
- 2) Árni Baldvin er skráður í Stjörnuna skv. útskrift úr félagakerfi KSÍ. Sjá skjal 2.

Sönnunargögn

1. Skjal 1 – leikskýrsla leiks UMFH-Hamar þann 18.05.2004 í VISA-bikar.
2. Skjal 2 – Útskrift úr félagakerfi KSÍ dags. 21.05.2004.

Virðingarfyllst,

Valdimar Hafsteinsson

formaður knattspyrnudeildar Hamars

Greinargerð UMFH

Varnir okkar byggjast á að umræddur leikmaður hefur ekki verið viðriðinn UMF Stjörnuna frá árinu 1996, þar sem hann lék í 2.fl. Á hann engan leik með meistaraflokki. Vottun Stjörnunnar um heimild til félagaskipta og að ekkert hafi verið því til fyrirstöðu fylgir hér fyrir neðan. Einnig munum við fá vottorð Stjörnunnar sem sýnir að umræddur leikmaður hefur ekkert tekið þátt í starfi eða keppni á vegum félagsins síðustu 8 ár. Eftir það hefur hann stofnað lið í utandeild árið 2001 og er hann þar skráður stofnandi og leikmaður knattspyrnufélagsins Fc Fame, kt 440403-2390. Gögn um þetta er hægt að fá staðfest hjá Hagstofu Íslands sem og Bjarna Gauki Þórmundssyni mótstjóra utandeildarinnar síðustu 3 ár.

Ætlun UMFH var aldrei að tefla fram ólöglegum leikmanni og getur starfsfólk KSÍ vottað ætlun og verk forsvarsmanna UMFH í þessu sambandi er verið var að vinna félagsskiptin fyrir mótið. Við munum einnig bera fram þá ósk, ef kæra þessi dæmist okkur í óhag, að sekt verði felld niður. Farið var í þessa keppni með góðri trú um að allir leikmenn væru löglegir og með það í huga að efla knattspyrnustarf á Flúðum, þar sem öflugt ungmennastarf er í gangi í dag, skv 4. grein c-liðs laga KSÍ að vinna að eflingu knattspyrnu i landinu.

Virðingarfyllst

f.h. UMFH

Ingi Björn Ágústsson

Úrskurður Dómstóls KSÍ

Ár 2004, fimmtudaginn 27. maí er dómþing í Knattspyrnudómstól KSÍ háð af Hilmarí Gunnlaugssyni, að Lagarási 4, Egilsstöðum. Fyrir er tekið mál nr. 2/2004, Knattspyrnudeild Hamars gegn knattspyrnudeild UMFH. Í málinu er kveðinn upp svofelldur úrskurður.

I.

Mál þetta er mótttekið af skrifstofu KSÍ 25. maí sl. Kærandi er knattspyrnudeild Hamars, Pósthólf 134, 810 Reykjavík. Kærði er UMFH, knattspyrnudeild. Málinu var úthlutað undirrituðum dómara í dómstól KSÍ þann 25. maí sl.

Dómkröfur

Kærandi krefst þess að úrslit leiks sem fram fór á milli kæranda og kærða í VISA bikarkeppni KSÍ þann 18. maí 2004, verði dæmdur tapaður UMFH og lokatölum breytt í 0-3 Hamri í vil. Kærði krefst sýknu af kröfum kæranda. Til vara krefst kærði þess að fari svo að fallist verði á kröfu kæranda, þá verði kærða ekki gert að sæta sekt.

II.

Formaður dómsins ákvað að láta málið sæta flýtimeðferð samkvæmt ákvæðum 8. gr. laga um dómstóla KSÍ. Kærða var gefinn kostur á að skila greinargerð í málinu og það hefur hann gert. Sem rökstuðning fyrir kröfum sínum vísar kærandi til reglugerðar KSÍ um félagaskipti leikmanna - félagaskipti innanlands og hlutgengi. Kærandi byggir kröfu sína á því að kærði hafi notað ólöglegan leikmann í nefndum leik liðanna. Árni Baldvin Ólafsson hafi verið skráður í Stjórnuna, Garðabæ, þegar leikurinn fór fram. Kærði heldur því fram að leikmaður sá er málið varðar hafi ekki verið viðriðinn Stjórnuna frá árinu 1996, þar sem hann lék í 2. flokki. Hefur kærði lagt fram yfirlýsingu framkvæmdastjóra knattspyrnudeildar Stjórnunnar. Þá hefur kærði bent á að leikmaðurinn hafi verið stofnandi utandeildarliðs og leikmaður með því.

III. Niðurstaða

Í málinu er ekki um það deilt að á þeim tíma sem umþrættur leikur fór fram var Árni Baldvin Ólafsson skráður í Stjórnuna, Garðabæ, í gagnagrunni KSÍ. Á því virðist byggt af hálfu kærða, að ekki hafi verið nauðsynlegt að framkvæma félagaskipti, þar sem leikmaðurinn hafði ekki leikið með Stjórnunni í meistaraflokki og ekkert síðan 1996. Í yfirlýsingu framkvæmdastjóra Stjórnunnar virðist gefið í skyn að félagaskiptaferli hafi farið af stað vegna þessa leikmanns og jafnvel að því hafi verið skilað inn til skrifstofu KSÍ. Í málinu liggur tölvupóstur frá skrifstofu KSÍ til fyrirsvarsmanns kærða, dags. 15. maí 2004, þar sem fram kemur að þartaldir leikmenn hafi fengið keppnisleyfi með UMFH frá og með 15. maí 2004. Árni Baldvin Ólafsson er ekki meðal þeirra sem þar eru taldir upp. Reglur KSÍ um hlutgengi leikmanna eru skýrar. Í 1. gr. reglugerðar KSÍ um félagaskipti leikmanna segir að hlutgengir séu til þátttöku í knattspyrnumótum leikmenn, sem gerst hafa félagar í því félagi sem þeir keppa með, eigi síðar en degi áður en kappleikur fer fram. Þegar leikmenn hafa gerst félagar í félagi, verða þeir að skipta um félag með sérstakri tilkynningu til skrifstofu KSÍ, undirritaðri af þar tilgreindum aðilum. Undantekningin frá þessari reglu á við um leikmenn yngstu flokka og kemur ekki til skoðunar í þessu máli.

Af framansögðu og reglum KSÍ leiðir, að leikmaðurinn Árni Baldvin Ólafsson var ekki hlutgengur með liði UMFH í hinum kærða leik við Hamar. Breytir þar engu þó það hafi ekki verið ætlun UMFH að nota óhlutgengan leikmann. Með vísan til 1. mgr. 4.3. í reglugerð KSÍ um knattspyrnumót, verður að dæma leikinn tapaðan fyrir kærða, 0-3. Varakrafa kærða fjallar um niðurfellingu sektar. Í 3. mgr. 4.4. í reglugerð KSÍ um knattspyrnumót segir að lið, sem mætir ólöglega skipað til leiks, skuli sæta sekt að upphæð allt að kr. 24.000. Að teknu tilliti til niðurstöðu málsins, málsatvika og aðstæðna að öðru leyti, þykir rétt að dæma kærða til greiðslu á kr. 12.000 sekt.

Hilmar Gunnlaugsson, dómari í Knattspyrnudómstól KSÍ, kveður upp dóm þennan.

ÚRSKURÐARORÐ

UMFH telst hafa tapað leik gegn Hamri í VISA-bikarkeppni karla, meistaraflokki, sem fram fór 18. maí 2004 með markatölunni 0-3. Kærði, UMFH, greiði kr. 12.000 í sekt.

Hilmar Gunnlaugsson

Um áfrýjun

Heimilt er að skjóta úrskurðinum til áfrýjunardómstóls KSÍ, og er áfrýjunarfrestur til áfrýjunardómstólsins 5 dagar frá því úrskurður dómstóls KSÍ var upp kveðinn og skulu almennir frídagar ekki telja þar með.

Dómþingi slitið

Hilmar Gunnlaugsson